

21 OCT 1998

Najib-Penuntut

SESI PENERANGAN UNTUK PENUNTUT M'SIA DI SEBERANG LAUT

PEKAN, 21 Okt (Bernama) -- Penuntut Malaysia di luar negara perlu diberikan penjelasan sebenar mengenai isu membabitkan keadaan politik dan ekonomi tanah air oleh para pemimpin negara ini sendiri, kata Menteri Pendidikan Datuk Seri Najib Tun Razak hari ini.

Katanya mana-mana menteri yang mempunyai urusan di luar negara perlu meluangkan masa berjumpa dengan pelajar Malaysia untuk menerangkan mengenai cabaran yang sedang dihadapi negara.

"Saya sendiri akan ke Australia hujung bulan ini untuk tujuan memasarkan Koridor Raya Multimedia dan akan menemui penuntut-penuntut kita di sana," katanya kepada pemberita selepas mendengar taklimat mengenai kejadian ribut di Kuala Pahang di sini. Beliau adalah Anggota Parlimen Pekan.

Najib berkata pelajar Malaysia di seberang laut ketandusan maklumat terkini mengenai situasi di tanah air dan sebaliknya menerima berita berat sebelah yang dihasilkan oleh media barat.

"Memang menjadi tugas anggota kabinet untuk membetulkan tanggapan negatif mengenai Malaysia seperti yang dipaparkan media asing seperti rangkaian televisyen CNN, CNBC dan Internet," katanya.

Sejak akhir-akhir ini, media barat sering menonjolkan berita negatif mengenai Malaysia berikutan pemecatan bekas Timbalan Perdana Menteri Datuk Seri Anwar Ibrahim daripada kerajaan dan Umno, serta langkah negara memperkenalkan beberapa kaedah untuk memulihkan ekonominya.

Najib berkata pendapat Perdana Menteri Datuk Seri Dr Mahathir Mohamad mengenai perlunya kawalan terhadap aktiviti pedagang mata wang yang dulunya menerima cemuhan, kini mula mendapat perhatian dunia.

"Pendapat beliau bukan lagi pendapat pinggiran tetapi telah mendapat pengiktirafan dunia," katanya.

Najib turut menyampaikan bantuan kepada mangsa-mangsa ribut di enam kawasan di Kuala Pahang dua hari lepas mengakibatkan lebih 100 rumah rosak.

Kementerian Pendidikan memperuntukkan RM50,000 untuk tujuan membaik pulih Sekolah Kebangsaan Indera Shahbandar.

-- BERNAMA

MAM MAI